



Broj/Број: 01/2a-50-1-2-43/09
Sarajevo/Сарајево, 12.5.2009.godine

ZAPISNIK

43. sjednice Komisije za vanjske poslove Predstavničkog doma Parlamentarne skupštine BiH, održane 12.5. 2009.

Sjednica Komisije počela je u 14 sati. Sjednici su prisustvovali članovi Komisije: Slavko Matić, Azra Hadžiahmetović, Husein Nanić, Azra Alajbegović i Denis Bećirović.

Osim članova Komisije, sjednici su prisustvovali: Sead Avdić i Mitar Pavić iz Ministarstva vanjskih poslova BiH, Biljana Tabaković iz Ministarstva finansija i trezora BiH, Samir Rizvo i Nermana Kadić iz Ministarstva sigurnosti BiH.

Zapisnik su vodili Merdžana Iglica, sekretar Komisije za vanjske poslove, i Miroslav Stanišić, stručni saradnik u Komisiji za vanjske poslove.

Za 43. sjednicu Komisije za vanjske poslove jednoglasno je usvojen sljedeći

DNEVNI RED

1. Usvajanje Zapisnika 42. sjednice Komisije;
2. Davanje mišljenja o saglasnosti za ratificiranje:
 - a) Protokola između Ministarstva sigurnosti BiH i Ministarstva unutrašnjih poslova i javne uprave Crne Gore o provođenju zajedničkih patrola uz zajedničku državnu granicu, (resorno ministarstvo: Ministarstvo sigurnosti BiH);
 - b) Sporazuma između Vijeća ministara BiH i Vijeća ministara Republike Albanije o readmisiji lica koja ilegalno borave (resorno ministarstvo: Ministarstvo sigurnosti BiH);
 - c) Prvog amandmana na Kreditni sporazum, potpisanog 25. 7. 2002., između Bosne i Hercegovine, koju zastupa Ministarstvo finansija i trezora BiH, i Kraljevine Španije, koju zastupa Ured kreditnog instituta – *Finansiranje sistema vodosnabdijevanja u općini Olovo* (resorno ministarstvo: Ministarstvo finansija i trezora BiH);
3. Usvajanje Orijentacionog radnog plana Komisije za vanjske poslove u 2009. godini;
4. Izvještaji i materijali pristigli na Komisiju:
 - Zabilješka sa sastanka članova Zajedničke komisije za evropske integracije PSBiH s delegacijom Zajedničke komisije za evropske poslove Parlamenta Irske, održanog u Sarajevu, 4. 3. 2009. (materijal MVP-a BiH);

- Izvještaj sa 11. međuparlamentarnog sastanka Zajedničke komisije za evropske integracije PSBiH s Delegacijom Evropskog parlamenta za odnose sa zemljama Jugoistočne Europe, održanog u Briselu, 20. i 21. 1. 2009. (materijal MVP-a BiH);
- Informacija o sastanku Komiteta za vanjske poslove Evropskog parlamenta (AFET) Brisel, 31. 3. 2009. (materijal MVP-a BiH);
- Izvještaj o posjeti ministra vanjskih poslova BiH Republici Hrvatskoj (materijal MVP-a BiH);
- Izvještaj o posjeti Salija Beriše, predsjednika Vijeća ministara Republike Albanije (materijal MVP- a BiH);
- Zabilješka sa sastanka Beriza Belkića, predsjedavajućeg Predstavničkog doma i Ilije Filipovića, predsjedavajućeg Doma naroda, s Monitoring timom Sekretarijata Vijeća Evrope, 2.4. 2009.;
- Izvještaj s parlamentarnog seminara "Vize i upravljanje granicama", 31.3. i 1.4. 2009., Brisel.;
- Informacija o liberalizaciji viznog režima – pismo osam ministara zemalja-članica EU upućeno Komisiji EU, odnosno predsjedavajućem Vijeća EU, u vezi s liberalizacijom viznog režima za zemlje zapadnog Balkana (materijal MVP-a);
- Informacija o ratifikaciji Sporazuma o stabilizaciji i pridruživanju sa BiH(materijal MVP-a BiH);
- Informacija o Plenarnom zasjedanju Evropskog parlamenta – usvajanje rezolucija o Zapadnom Balkanu i BiH (materijal MVP-a);
- Izvještaj sa sastanka Komiteta za kulturu, nauku i obrazovanje Parlamentarne skupštine Vijeća Evrope, Pariz, 10. 3. 2009., i Komiteta za pravne poslove i ljudska prava Parlamentarne skupštine Vijeća Evrope, Berlin, 23. i 24. 3. 2009.
- Izvještaj sa 120. zasjedanja Skupštine Interparlamentarne unije, održanog u Adis Abebi, od 5. do 10. aprila 2009.

Ad.1. Usvajanje Zapisnika 42. sjednice Komisije

Nije bilo primjedbi i članovi Komisije jednoglasno su usvojili Zapisnik 42. sjednice Komisije za vanjske poslove.

Ad. 2. a) Davanje mišljenja o saglasnosti za ratificiranje Protokola između Ministarstva sigurnosti BiH i Ministarstva unutrašnjih poslova i javne uprave Crne Gore o provođenju zajedničkih patrola uz zajedničku državnu granicu

Mitar Pavić iz Ministarstva vanjskih poslova BiH je na početku kazao da je za sva tri sporazuma ispoštovana sva zakonska procedura u cijelosti.

Nermana Kadić iz Ministarstva sigurnosti BiH kazala je da se ovaj protokol zasniva na konvenciji o policijskoj saradnji koji je BiH ratificirala u 2007. godini. Na osnovu člana 28. a u vezi s članom 34. ove konvencije, predviđeno je da strane potpisnice ove konvencije zaključe međusobne bilateralne protokole. Jedan od tih je i ovaj Protokol o provođenju zajedničkih patrola duž zajedničke državne granice. Cilj ovog protokola je efikasnija borba protiv svih oblika kriminala.

Nije bilo rasprave i članovi Komisije jednoglasno su dali pozitivno mišljenje Predstavničkom domu u vezi s ratifikacijom ovog protokola.

Ad. 2. b) Davanje mišljenja o saglasnosti za ratificiranje Sporazuma između Vijeća ministara BiH i Vijeća ministara Republike Albanije o readmisiji lica koja ilegalno borave

Samir Rizvo iz Ministarstva sigurnosti BiH kazao je da je ovaj sporazum potpisan zajedno s još dva sporazuma, u toku posjete premijera Republike Albanije Bosni i Hercegovini. Zaključivanje Sporazuma o readmisiji lica koja ilegalno borave bio je jedan od uslova koje je bh. strana postavljala u okviru razgovora o liberalizaciji viznog režima. Sporazum je standardiziran i veoma je sličan nizu ovakvih sporazuma koji su do sada zaključeni s mnogobrojnim zemljama u regiji i Evropskoj uniji. Cilj Sporazuma je da se stvori pravni okvir kako bi se zatečeni albanski državljani, koji nezakonito borave na teritoriji BiH, mogli vratiti u Albaniju i obrnuto, bez bilo kakvih prepreka. Također, ovim sporazumom predviđena je mogućnost da BiH i Albanija mogu jedna drugoj vratiti i državljane trećih zemalja koji su ilegalno tranzitirali kroz BiH ili Albaniju.

Nije bilo rasprave i članovi Komisije jednoglasno su dali pozitivno mišljenje Predstavničkom domu u vezi s ratifikacijom ovog sporazuma.

Ad. 2. c) Davanje mišljenja o saglasnosti za ratificiranje Prvog amandmana na Kreditni sporazum, potpisanog 25. 7. 2002., između Bosne i Hercegovine, koju zastupa Ministarstvo finansija i trezora BiH, i Kraljevine Španije, koju zastupa Ured kreditnog instituta – *Finansiranje sistema vodosnabdijevanja u općini Olovo*

Biljana Tabaković iz Ministarstva finansija i trezora BiH kazala je da je BiH 2002. godine aplicirala sa tri kredita za sektor voda kod Fonda za razvoj Kraljevine Španije koji je u okviru Ministarstva trgovine industrije i turizma. Za općinu Olovo je 2002. godine odobren kredit od 2 miliona i 150 hiljada eura pod vrlo povoljnim uslovima, s kamatnom stopom od 0,1 posto i troškovima kredita od 0,05 posto. Kredit je odobren na 36 mjeseci s 15 godina grejs perioda. Kredit je bio robne prirode preko kojeg je španska vlada plasirala svoju robu i usluge i tako podsticala izvozna preduzeća u svojoj zemlji. Sve ovo je uvod za amandman na taj kreditni Sporazum koji se odnosi na dva elementa, prvi je više formalno pravne prirode i odnosi se na izmjenu naziva ministarstva, a suštinska promjena koja je pokrenula ovu izmjenu osnovnog sporazuma odnosi se na izmjenu u procedurama povlačenja nepovučenog iznosa kredita gdje je upravljačka struktura u općini Olovo odugovlačila da potpiše konačnu situaciju za izvođače radova u iznosu od 21 hiljadu eura iz prostog razloga što nije bilo spremnosti u tom periodu realizacije da općina završi neke predradnje koje su bile preduslov da se završi provođenje projekta kao što je izdavanje građevinskih dozvola. Amandman daje mogućnost Ministarstvu finansija i trezora BiH da se kao posuđivač u tom dijelu nepovučenih sredstava javi kao potpisnik faktura i sve prateće dokumentacije koja će omogućiti izvođaču radova da zaključi taj posao.

Nije bilo rasprave i članovi Komisije jednoglasno su dali pozitivno mišljenje Predstavničkom domu u vezi s ratifikacijom Prvog amandmana na Kreditni sporazum potpisan 25.7. 2002.

Ad. 3. Usvajanje orijentacionog radnog plana Povjerenstva za vanjske poslove u 2009. godini

Sead Avdić iz Ministarstva vanjskih poslova BiH dao je tri sugestije na orijentacioni radni plan Komisije za vanjske poslove. Prva sugestija je da se organizira posjeta i obilazak Ministarstva vanjskih poslova BiH s ciljem upoznavanja sa organizacionom strukturom Ministarstva vanjskih poslova, tehnologijom i sadržajem rada, sektora, odsjeka i samostalnih odjeljenja, a posebno bi trebalo da bude prezentiran način komunikacije i koordinacije sa DKP-ima i misijama BiH u svijetu. Drugi prijedlog je da se organiziraju tematske sjednice Komisije za razmatranje strateških dokumenata kao što su: Zakon o vanjskim poslovima BiH, strateški pravci i prioriteti u vođenju vanjske politike BiH, obaveze koje su preostale kao uslov za liberalizaciju viznog režima za građane Bosne i Hercegovine. I treći prijedlog je posjeta DKP-ima, misijama BiH u Briselu i Njujorku, i ambasadama BiH u Republici Hrvatskoj i Republici Srbiji.

Azra Hadžiahmetović kazala je da bi prijedlogu Avdića dodala da bi, prilikom zvaničnih posjeta Komisije nekoj zemlji, Komisija trebalo da ima pregled ili sugestiju vezanu za ratifikaciju Sporazuma o stabilizaciji i pridruživanju u nacionalnim parlamentima, kao i saglasnost zemalja za članstvo BiH kao nestalne članice u Vijeću sigurnosti UN-a.

Azra Alajbegović rekla je da bi bilo dobro da se članovima Komisije dostave zapisnici sa savjetovanja koje je početkom septembra prošle godine održano za sve ambasadore i zaposlene u DKP mreži i da bi to bio dobar materijal. Dodala je da bi to bio dobar materijal za tematsku sjednicu jer su ambasadori na tom savjetovanju iznijeli sve probleme s kojima se susreću u obavljanju poslova.

Slavko Matić predložio je zaključak da se usvoji orijentacioni radni plan zajedno s prijedlozima Milice Marković koji su Komisiji dostavljeni u pisanom obliku, s prijedlozima i sugestijama koje je usmeno iznio Sead Avdić iz Ministarstva vanjskih poslova BiH kao i primjedbama i prijedlozima Azre Hadžiahmetović i Azre Alajbegović koje su izrečene u raspravi o Orijentacionom radnom planu za 2009. godinu, uključujući i to da nije moguće kvartalno ili mjesečno planiranje rada Komisije iz objektivnih razloga, već godišnje kao i da plan rada Komisije iz objektivnih razloga ne može biti fiksni već fleksibilan, u zavisnosti od aktuelnih događaja i potreba BiH na vanjskopolitičkom planu.

Članovi Komisije jednoglasno su prihvatili zaključak koji je predložio predsjedavajući Slavko Matić.

Ad. 4. Izvještaji i materijali pristigli na Komisiju

Sekretar Komisije Merdžana Iglica upoznala je članove Komisije s nastavkom okruglog stola o poboljšanju ispunjavanja vojno političkih obaveza BiH u kontekstu UN-a i OSCE-a koji je započet na Ilidži. Nastavak Okruglog stola je na Jahorini 1. i 2. 06. 2009. godine. Također, članovi Komisije upoznati su sa molbom Odbora za odbranu Parlamenta Republike Češke koji će biti u posjeti BiH da se sretnu s Komisijom za vanjske poslove 28.5. 2009., od 12.15 do 13 sati.

Članovi Komisije primili su k znanju ostale informacije i izvještaje.

Sjednica je završena u 14,40 sati.

Zapisnik sačinio:

Miroslav Stanišić, stručni saradnik u Komisiji za vanjske poslove

Sekretar Komisije

Merdžana Iglica

Predsjedavajući Komisije

Slavko Matić

Kopija MVP-u BiH